

【斬龍演義】 客語長篇小說 張捷明 (四縣腔)

【楔仔】：斫開天地間个一條必縫

光緒年間，在一搭闊野野个田洋膠山腳相接个遠處，有一高一矮兩個乞食仔，向等還看毋着^(doˊ)个石城庄慢慢行，西片天既經暗分，東片山十五个月光，就接等掖下銀光搵手佢兜照路。成時矮个乞食仔停下來，高个乞食仔會跔下去，摸一下矮乞食仔个頭那，兩隻人影又一領一著^(coŋ)，琢琢仔¹緊行。一直到石城庄既經出現在目珠看得着^(doˊ)个前方。

毋過行到庄仔口既經斷烏，該防番防賊个柵仔門既經關起來，喊乜無人敢應，就莫講想分一碗飯食。

石城庄係這就近盡大个庄頭，庄肚有關爺廟，人生係有麼个過毋得个炭，做得去求關老爺。毋過，佢兜這下盡想先分兩口飯食，眼前既經三日分無飯，食水毋會飽，顧毋得另外還有一件事。

四四方方个石城庄，南北各開一扇大柵仔門，城牆頂高種烏不企²，城牆外再過加種一排笏竹，三層保護，圍到搵腹實落，像一隻鐵桶江山，柵仔門係無打開，除忒飛高个鳥仔、軟身个風，同會鑽縫个聲，其他个，連山豬就撞毋落去。

好得南柵仔門外背還有石爺石哀，乞食仔高不將坐到佢兜个腳下寮一下。

兩個乞食仔一個係老个，瘦夾夾，白白个目眉毛長到兩片脢盎仔³再垂下來，目珠炯炯有神⁴，白白个鬚長到遮忒嘴，講話長長个耳垂會緊停動，算命个講，該係福相、乜係長壽相，毋過今佢一付病奄奄仔个圓身，拖等一隻跛腳，還愛帶等一個細乞食仔，就係厥孫女。

厥孫女怕正七、八歲，迦等一坵爛爛環環个紅布巾，包毋摯佢瘦到伸皮包骨个骨架仔，頭那相比佢个瘦骨架，就變做當大粒，圓圓大大个目珠仁，紅漬漬。

老乞食仔討無飯，無法好想，就先帶等細乞食仔在月光下企起來，在石爺石哀頭前兩手合拜：

「石爺石哀啊，老乞食仔見笑，連自家个孫女就顧毋飽，無能力準備牲儀果子來拜喏，請月光做證，佢正經係用一份誠心來到這，請哀過吾這孫女無爺無哀，佢又恁老咁毋知哪久會歸西，請石爺石哀收佢做契女，乜請搵手尋一个積善之家收留佢。」

又低頭教細乞食仔：

「阿甜，喊契爺契哀！」

「契爺！契哀！」

¹ 琢琢仔：雖然慢卻持續不懈的進行。

² 烏不企：一種多刺植物，連鳥就不敢站。

³ 脢盎仔脢盎仔脢盎仔：太陽穴

⁴ 炯炯有神：guen、音同耿

「從今後你就有爺有哀有人體恤地，阿公係無在，你愛堅強。」

「佢跣阿公就好。」

「慧嫻，阿公係講，佢係無在，正來這等石爺石哀安排。」

「唔！」

細乞食仔既經企毋核，老乞食仔喊佢坐到地泥下，憑等石哀該粒大石頭，像石哀掙等佢，驚佢隨時會橫下去。

老乞食仔開始挨弦索，「二二哦二哦二哦～」唱起乞食歌，想討一碗飯分厥孫女仔食。

西片烏色个天底下，笏竹尾分烏風搖到絮絮疏疏，幾片烏雲飛過，又遮忒東片个月光。

該老乞食仔啞啞个聲，愛靠弦索來搵手傳聲：

「肚又飢來身又病，還有孫女會無命。

毋捨一命將佢救，求您施捨一碗飯。」

今晡日就十五，庄肚人應該乜去敬伯公，毋看僧面看佛面，想請善心人看伯公面子分一息衰過人，老乞食仔又唱：

「伯公面前做好心，救佢飢寒兩條命。

好心之人有好報，合家平安好積善。」

該老聲失失、該老皮皺手緊顫、該舊弦索一來一去拉慢板、該弦弓一領一著^(cog)成時攸着^(do)弦殼，會無奈跌板，人聲必離必鬚，弦聲緊搓、緊掙、緊勾，緊溜、緊滾，兩股聲、三股聲、慢慢纏共下，又慢慢攪入苦、酸、冷、澀、善，滾成兩子阿公無奈人生个望善歌，又慢慢化成一絲一絲鑽入柵仔門、一彎一幹尖過笏竹縫、一粒石一粒石攀上石牆、輕手輕腳躡過烏不企、淪過石城庄人个耳公，勾出每一儕人心肝肚盡軟該份心焦。

係毋係歌聲忒苦情，任在老乞食仔仰般煞猛唱，還係無看着有人打開柵仔門。

毋過，係有喜樂，麼儕愛唱苦情歌呢？老乞食仔又開嘴較大聲兜，唱加一段巫阿來勸善歌，請冷風搵手再傳入柵仔門肚：

「壹想光緒丙子年，彭蔡貳家蓋牽連，牽連打死巫阿富，害着連庄蓋無閒。

貳想巫屋笑嘻嘻，人強馬壯就出旗，壹陣趕到七十分，三庄圳水打忒佢。

三想長河係無理，私造王法就係佢，幾多好人無插事，濫擅搬搶人家資。

四想連庄就著^(cog)驚，就請食糧做標營，兩家標營紛紛亂，這擺事帳做得成。

……」

這係麼儕做个歌仔，老乞食仔毋管佢，橫直⁵係這恁多年，就在這遠遠近近大大細細十八隻庄頭肚，大家盡關心个巫阿來擎黃旗⁶傳說故事，該年官兵

⁵ 橫直：反正

⁶ 擎黃旗：造反自立為王。

就像在這石城庄集合，再兵分兩路入山剿賊，下後毋知幾時起勢，就傳出這條乞食歌，官府恬恬無講麼个，乜無禁唱，就緊傳緊闊。

盡要緊个係，這巫阿來歌乜係佢這隻命伸一線个細孫女，盡愛聽个勸善乞食歌。

這隻細孫仔係光緒二年，一場火銃戰過後，在戰場留下來个孬仔仔，乜係戰場項唯一留下來還會停動、還會出聲个生命。佢無愁自家跛腳做乞食，淨想愛畜佢大，分佢衰過个爺衰，留一脈香火在人間，就一直渡佢到這下。這下佢單淨愁今暗晡係討毋着幾口飯分細孫女食，就驚怕耐毋到天光。佢又使出盡尾个一身氣力，煞猛再唱，就算無討着飯，乜愛唱加一擺分厥衰過个細孫女聽，厥孫女逐擺都聽到睡忒，枵到睡忒……

「五想阿貴就開言，大家退入斷龍山，斷龍新莊來結寨，各各心中膽包天。

六想阿貴聞西西，公人勸處和得佢，阿貴開言應承好，長河又喊同佢鬪。
七想公人鬧連連，辦出彭屋八百元，就將蔡某放佢轉，大家忍氣一時間。
八想長河膽包天，就討連庄兩三千，連庄圳水佢打得，斷龍奈等也有錢。
……」

在這有生番又有春柄賊个所在，連伯公乜毋敢怪怨麼人，斷烏咁，麼儕敢開柵仔門出來看呢？就衰過這兩子阿公，驚怕暗晡夜就會共下去見閻王。

老乞食仔乜毋知自家耐得到天光無？佢乜毋管，乜無法管，只望石爺石哀會惜厥細孫女、伯公乜會保佑佢、月光乜會指引佢、還會有好心人代佢惜細孫女，望得細孫女平平安安大。

佢又嘎等放勢拉，放勢唱，佢愛從一想唱到四十想，苦命个細孫女佢愛聽就好，失失个老聲，在斷烏个烏水河脣唱到截截斷

「九想連庄有章程，大家作議就上城，上城官府搬來到，錢銀了忒心也甘。

十想文武到下來，查到標營想不開？，連庄又告巫阿貴，蕭姜又告巫阿來。

十一想大老就轉城，將寫文書星夜行，愛開庫銀來征賊，行文奏聖轉京城。

十二想大老到下來，就調頭人愛到來，庄庄頭人都調到，愛征山賊巫阿來。

……」

佢看着細孫女略略仔擘開目珠，看等地泥下有一粒怕係庄肚人跌忒个蜆仔，佢想擘開來食，又無麼个好翹，旋旋風天頂頂跌下一隻楔仔，楔入蜆仔殼必縫，既經硬硬砧開一隻細縫，毋過，細乞食仔等毋掣，大大个目珠嘎眨起來，橫到地泥下，蜆仔就在佢目珠頭前……

老乞食仔个弦索乜同隻時間拍拍風『崩~』一聲，弦斷音斷，弦倒人橫，歸隻人就向等細細孫女方向橫下去，佢愛用身項盡後个一點燒暖，揸等佢惜到像命个細孫女仔，毋好分風吹、分日炙……

石牆肚，老乞食仔个弦聲細心細義，正愛勾出人性肚盡善良个心肝，無胚⁷着『嘯~』一聲，弦斷音斷，柵仔門內恁多恁多个耳公音線硬硬掙斷⁸，勾音剛過⁹，正知心肝乜會^(cog)傷，正知恁多恁多个人，全係硬心肝。正遽遽喊人打開柵仔門……

.....※.....※.....※.....

這下目珠仁紅漬漬个細乞食仔，既經無了病、無了痛、無了肚飢、無了時間先後，目珠又擘開來，側身尖入蜆仔縫肚，正知蜆仔裡背還有另一片天地，來去自由，又一路遊遊野野，看着一尾青龍，騰雲駕霧飛咁三萬年，一直飛到瘰^(kioi)¹⁰咁，停到地面。

從龍頭到龍尾，佢腳踏青山五百甲，喊風引雨，綠水起白雲，白鶴珍風飛；再呵一口氣，推開蜆仔平洋五百甲，浮嵐濛煙起，一直推到分一隻石龜擋下來為止；再睨一口龍涎成河壩，龍門搶珠撒上撒下，河壩彎來幹去，一百年俛東，一百年對中，再一百年靠西。龍氣聚成脈，龍汗成養份，錫來掖麻掖米个蟻公，主客混雜、人鬼難分，都來到這尾青龍个世界相爭絡食。

這央時佢看着伯公，伯公安排佢去草頭下核；佢看着月光，軟軟个月色，牽等佢个瘦手、揸等佢受傷个心，分佢燒暖。

⁷ 胚：poi / 料想

⁸ 掙斷：dui \，扯斷。

⁹ 剛過：gua \，刮過

¹⁰ 瘰：kioi 累

【三分天下】

人無恁多鬼較多。算來命愛幾硬，正毋會堵着鬼？

巫阿來第一擺堵着鬼，係在斷龍崑下做掌牛哥仔該下，該年係道光。
當多年後，換佢做鬼，一跛一跛倒轉來斷龍崑該下，既經係光緒帝登基第二年。

佢見人就問：

「你有看着吾頭那無？」

毋過人鬼無共世界，無人看得着佢，當然乜無人知佢在該尋厥頭那。除忒又再過十年，在石城石哀腳下討食該兩子阿公，其中該隻細乞食仔。

佢高不將見鬼就問：

「你有看着吾頭那無？」

「正經見着鬼，你係無頭那，該你係用哪蕊目珠看佢？用哪張嘴摻佢講話个？」

「係喲，佢仰會恁惹，問這種抓無頭爛个問題？」

佢用鬼手搭一下鬼額頭，咦，空空？佢又摸一下腦之背，空空？摸一下鼻公？摸一下頸根？……該鬼迷个心肝窟，既經冷透底，佢毋知頸根會黏黏泱泱無？佢毋敢再摸。

算來佢有頭那抑係無頭那，一直係佢盡大个謎。

佢正想起，還細在斷龍崑下做掌牛哥仔該下，堵着个該道光、該隻鬼，還有該隻細阿妹……

該隻寒天尾，在佢第一擺堵着鬼个前一暗晡，天頂還落等霜雪水，日頭早早落西山，食飽夜，一群長年仔就在大架仔床頂，跔燒彈牙風¹¹，草蓆底下絮等貴貴个燥禾桿，睡起來軟沁軟沁，佢兜試着這隻黃頭家實在當好。

巫阿來盡細，就認份睡到壁角恬恬聽。

¹¹ 彈牙風：聊天，說笑，吹牛。